

PLEASE EMBARGO UNTIL DELIVERY

PLEASE CHECK AGAINST DELIVERY



UCAPAN OLEH ENCIK SIDEK BIN SANIFF (KOLAM AYER) PERUSAHAAN MERANGKAP HALEHWAL PARLIMEN (PERDAGANGAN DAN PERUSAHAAN MASYARAKAT) DI PERASMIAN PESTA SILAT KEBANGSAAN ANJURAN PERSISI DI DEWAN BADMINTON, GUILLEMARD ROAD, SINGAPURA, PADA HARI JUMAAT 28 OGOS 1981 JAM 8.00 MALAM

Pertandingan Silat yang diadakan malam ini dan malam esok adalah salah satu acara menyambut hari ulangtahun kemerdekaan Singapura yang jatuh pada 9 Ogos. Ini bererti kita telah merayakan tahun ke 16 kemerdekaan negara kita.

Hari kemerdekaan adalah hari terpenting dalam sejarah sesebuah negara. Terdapat negara yang terpaksa berperang dan mengalirkan darah perwira-perwiranya untuk mendapatkan kemerdekaan. Paling tidak mengalirkan keringat dari dahi-dahi yang di dalamnya mengalir pula semacam perang urat saraf yang menghebat demi mendapatkan kesucian kemerdekaan negara. Itulah sebabnya apabila tiba masanya untuk merayakan hari kemerdekaan, rakyat melakukannya dengan penuh kesedaran khususnya pada hari kemerdekaan itu sendiri seperti mengadakan

perbarisan secara besar-besaran di sesuatu tempat ataupun seperti yang dilakukan pada tahun ini di enam buah tempat yang berasingan. Partisipasi dari mereka yang beruniform dan yang tidak beruniform biasanya mencerminkan kebulatan fikiran, tekad dan perangsang untuk terus menghargai, mengekalkan dan menghayati kemerdekaannya itu. Ia juga menampakkan taat setia yang tulen dan keperwiraan atau 'patriotism' dari semua - samada yang mengambil bahagian atau yang menonton. Semangat ini perlu ditanam terus tiap tahun khususnya ketika ini di mana segala pertanda menunjukkan bahawa dunia boleh terancam pada bila-bila masa sahaja. Pergeseran di Poland, Timur Tengah, Afrika atau yang paling dekat seperti Kampuchea dan Afghanistan adalah contoh-contoh yang harus diwaspadai oleh negara-negara yang cintakan keamanan.

Kegembiraan yang sedang kita rasai sekarang hanya akan berterusan sekiranya kita dapat menginsafi

pengertian kemerdekaan yang kita sambut ini. Semangat kejiwaan yang telah disemai antara sesama kita juga dengan jiran tetangga di rantau ini adalah salah satu fungsi yang boleh menjamin keadaan berterusan kemerdekaan itu. Jalinan yang dibuat itu perlu diperkokoh terus samada antara sebuah negara dengan yang lain atau melalui badan-badan budaya dan sosial seperti PERSILAT. Usaha-usaha serupa ini di peringkat organisasi harus digalakkan terus. Semuga jalinan yang kita sedang lakukan ini di samping menghidupkan satu warisan pusaka dari satu kelompok manusia itu dapat pula dijadikan jambatan yang menghubungkan keharmonian semua kelompok manusia di dalam negara-negara yang terlibat itu.

Saya mengalu-alukan partisipasi-partisipasi dari negara-negara jiran kita Indonesia dan Malaysia dengan harapan satu masa nanti kita akan dapat mengajak jiran ASEAN kita dari Thailand dan Filipina untuk menyertai sama Pesta Silat ini.